

Lung a lautre pevent facilement dire
 Jay bien trouue ce que mon cuer desire
 Et aussi Dieu leur a monstre comment
 Il les ayme car veritablement
 Deulx sont produitz cinq princes triumphans
 Plaisans et beaulx legitimes enfans
 Nul mauuais fruit ne peut porter bon arbre
 Anthoine donc leur filz duc de Calabre
 Je puis dire le prince desesperance
 Car en lacourt du noble roy de France
 A tel regnon quil ny a son semblable
 Tant est prudent bening et amyable
 Puis le seigneur Claude par nom clame
 En Lorraine loue prise fame
 Car le pere nuyt et iour luy apprend
 A seruir Dieu et mesmement comprend
 Auecques luy lexercice de guerre
 Pour succumber ses ennemys par terre
 Et de prendre desormais cure et soing
 De secourir ses amys au besoing
 Apres y est iehan euesque de Metz
 Que par raison au rang des saiges mectz
 Parfait il est en tous dons de nature
 Car de son pere est propre pourtraicture
 Il est gentil beau doux ingenieulx
 Loys aussi est plaisant et ioyeux
 Fileul du roy de France quon espere
 Quil ensuivra son parrain et son pere
 Francoys aussi encor au berceau est
 Mais quil soit grant si Dieu plaist sera prest
 De recevoir bonne introduction
 Tant quil sera vaisseau de election
 Et grant pillier en nostre mere eglise
 Encor pourroit on faire la devise
 Daucuns enfans qui leur sont trespassez
 Lesquelz estoient bien faitz et compassez
 Tant filz que filles qui sont sans contrediz
 Auec Dieu pour peupler paradis
 La ou devons selon raison pretendre
 Or me semble il que ie me puis mesprendre
 A raconter une vertu louable
 Que a la dame tres noble et veritable
 Qui non obstant sa grande auctorite
 Sur toutes choses elle ayme verite
 Et nappete lire choses mondaines
 Comme rommans ou folles amours vaines
 Voulant en suyure son espoux son seigneur
 Humble de cuer et deuot zelateur